

A QUEN VAI DIRIXIDA?

Trátase dunha materia troncal de opción dirixida ao alumnado de **4º ESO** que cursen o itinerario de **ensinanzas académicas**. Neste sentido é recomendable para aqueles alumnos/as que pensen cursar o bacharelato de **Humanidades e Ciencias Sociais**, aínda que tamén pode resultar útil para aqueles alumnos/as que finalmente opten por cursar un ciclo de formación profesional de grao medio, especialmente se se trata dun ciclo das seguintes familias:

- Administración e Xestión.
- Comercio e Márketing.
- Hostalaría e Turismo.

O estudo da economía proporciona, xunto coa formación técnica, competencias lingüísticas e de comunicación, matemática e competencias básicas en ciencia e tecnoloxía, sociais e cívicas, así como sentido da iniciativa e espírito emprendedor.



ECONOMÍA

TO
ECO

CUARTO ESO



A materia de Economía en 4º ESO introduce na ensinanza secundaria obrigatoria a posibilidade de adquirir unha formación básica que permita comprender as regras básicas que explican os acontecementos económicos e a linguaxe específica utilizada por economistas e medios de comunicación para analizar eses feitos. O estudo da economía axuda a percibir e a coñecer o mundo, facilita a comprensión dos conceptos utilizados habitualmente na análise económica e empresarial, serve para potenciar destrezas de razoamento, abstracción e interrelación, e proporciona ferramentas para examinar de xeito crítico a sociedade. Contribúe tamén a desenvolver a curiosidade intelectual, a capacidade analítica, o rigor e a amplitude de perspectivas á hora de indagar no coñecemento de variables como o crecemento, a pobreza, a educación, a saúde, a riqueza, o medio ambiente, etc.,



XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA

OBXECTIVOS:

- ✓ Integrar o concepto de economía como ciencia da elección. Identificar os principais axentes económicos, a súa actuación e as relacións entre eles.
- ✓ Adquirir vocabulario económico con rigor, de modo que permita coñecer e interpretar a realidade económica que nos rodea.
- ✓ Describir a importancia da empresa e o emprendemento no proceso de creación de riqueza dunha sociedade.
- ✓ Identificar as consecuencias das actividades empresariais para a sociedade.
- ✓ Coñecer, controlar e xestionar as variables de ingresos e gastos dun orzamento persoal e saber decidir con racionalidade entre distintas alternativas económicas da vida persoal e relacionalas co benestar propio e social.
- ✓ Analizar o papel do diñeiro no funcionamento da sociedade. Valorar o aforro como medio para alcanzar logros persoais.
- ✓ Explicar o papel do sector público e valorar críticamente os efectos da súa actuación ou ausencia de actuación respecto da igualdade e o benestar dunha sociedade.
- ✓ Diagnosticar os efectos da inflación como elemento distorsionador das decisións que toman os axentes económicos nunha sociedade.
- ✓ Analizar as características principais do mercado de traballo.
- ✓ Coñecer e valorar as vantaxes que supuxo o comercio internacional, así como os custos que implicou no desenvolvemento dalgúns países.
- ✓ Buscar, seleccionar, comprender e valorar noticias económicas procedentes de distintas fontes.
- ✓ Realizar tarefas en grupo e participar en debates cunha actitude construtiva, crítica e tolerante, fundamentando adecuadamente as opinións e valorando o diálogo como unha vía necesaria para a solución dos problemas económicos.

RESUME DE CONTIDOS:

- Bloque 1. Ideas económicas básicas.
- Bloque 2. Economía e empresa.
- Bloque 3. Economía persoal.
- Bloque 4. Economía e ingresos e gastos do Estado.
- Bloque 5. Economía e tipos de xuro, inflación e desemprego.
- Bloque 6. Economía internacional.

A materia de 4º de ESO distribúese en seis bloques que permiten o estudo da economía como ciencia e do papel dos axentes económicos.

No bloque 1 ("Ideas económicas básicas") recóllense aspectos relativos aos principios económicos, á terminoloxía propia e á metodoloxía da ciencia económica.

No bloque 2 ("Economía e empresa") analízase o papel e o funcionamento do/da axente de empresas na economía.

O seguinte bloque ("Economía persoal") está dedicado ao estudo da transcendencia das decisións económicas na vida das persoas.

O cuarto bloque ("Economía e ingresos e gastos do Estado") repasa o papel estatal no funcionamento económico a través da análise dos seus ingresos e gastos.

No quinto bloque ("Economía e tipos de xuro, inflación e desemprego") repásanse os aspectos máis salientables da economía financeira e a súa repercusión na actividade económica e o nivel de emprego.

E para rematar, o bloque de "Economía internacional" fai un breve repaso do funcionamento do sector exterior da economía con especial fincapé nas repercusións da integración económica e a globalización.